



13

Niining Leksyona Matun-an Mo Kini

Gihugasan Ni Jesus ang Tiil sa Iyang mga
Tinun-an

Gipasidaan ni Jesus ang Pagbudhi Kaniya

Ang Bag-ong Sugo

Gipasidaan ni Jesus ang Paglimod ni
Pedro

GIHUGASAN NI JESUS ANG TIIL SA IYANG MGA TINUN-AN

(Basaha ang Juan 13:1-20)

Sa adlaw sa pasko sa mga Judio, nagahalad ang mga tawo ug karnero alang sa kapasayloanan sa ilang mga sala. Busa sa adlaw usab sa pasko sa mga Judio, si Jesus ang Cordero sa Dios igahalad alang sa sala sa kalibutan. Apan una sa tanan kinahanglan tudloan Niya ang Iyang mga tinun-an. Niining higayona ang mga tinun-an naglalis kon kinsa gayud ang mahimong labing bantogan sa gingharian sa Dios. Si Jesus buot motudlo kanila nga ang matuod nga pagkabantogan mao ang pag-alagad sa uban.

Nahimo na nga batasan sa usa ka sulogoon ang paghugas sa tiil sa ilang bisita. Dili ba ang usa ka higala buot mopasidungog sa usa ka higala pinaagi sa paghugas sa tiil? Apan wala gayuy usa sa mga tinun-an nga buot mobuhat sa bu luhaton sa usa ka sulogoon ug mo hugas sa tiil sa uban. Busa gihugasan ni Jesus ang mga tiil sa mga tinun-an.



Ug nanga-ulaw sila pag-ayo. Tungod kay si Jesus nga anak sa Dios, maoy mihugas sa ilang mga tiil. Ang ilang agalon maoy mikuha sa dapit sa usa ka ulipon aron mobati sila ug kasayon. Kon buot kitang mosunod kang Jesus kinahanglan magpaubos kita sa atong kaugalingon ug mobuhat sa bisan unsang butang nga kinahanglan

buhaton alang sa uban, Kini mao ang atong paagi sa “paghugas sa ilang mga tiil.”

Nagtudlo pa gayud si Jesus ug laing pagtulunan. Kinahanglang togutan ta si Jesus sa paghinlo kanato sa matag adlaw gikan sa atong mga sayop. Nabatasan na sa mga tinun-an nga maligo sa dili pa mokaon. Apan nahugawan lang gihapon ang ilang mga tiil pinaagi sa paglakaw-lakaw sa abugong mga dalan. Ang pagkaluwas sama ra nga ikaw naligo. Sa pagdawat nato kang Jesus ingon nga atong Manluluwas, gihugasan Niya ang tanan natong mga sala, nahanaw na sila ug gikalimtan na hangtud sa hangtud. Apan sa atong adlaw-adlaw nga paglakaw sa kinabuhi usahay “mahugawan ang atong mga tiil,” Mabuhat nato ang mga butang nga dili unta angay nga pagabuhaton. Dili na kinahanglan nga magpaluwas pa kita pag-usab apan gikinahanglan nga dad-on nato ang atong mga sala ug kapakyasan ngadto kang Jesus ug togutan Siya sa paghugas niini.

Buhata Kini

1. Unsa may gibuhat ni Jesus aron katudloan ang Iyang mga tinun-an sa pag-alagad sa usa ug usa.
 - . . . a) Gikuha Niya ang dapit sa usa ka sulogoon ug gihugasan ang ilang mga tiil.
 - . . . b) Gisulti ni Jesus kon giunsa Niya pagbiya ang langit aron mamahimong tawo.
 - . . . c) Gisilbihan Niya ug pagkaon ang mga tinun-an.
2. Aduna ka bay mga sayop nga buot mong mabiyaan? Pagpakigsulti ni Jesus mahitungod niana.

GIPASIDAAN NI JESUS ANG PAGBUDHI KANIYA

(Basaha ang Juan 13:21-30)

Nasayud si Jesus unsaon Siya pagbudhi. Si Judas usa sa Iyang kaugalingon nga tinun-an, magabudhi Kaniya. Ang problema ni Judas mao ang iyang gugma sa salapi. Siya ang magtitipig sa ilang kwarta ug nangawat siya gikan sa salapi nga dili iya. Daw gamay ra kini nga sala apan ang usa ka sala nagapadulong man ngadto sa laing sala. Gitugyan ni Judas si Jesus ngadto sa Iyang mga kaaway agig bugti sa salapi nga katloan ka buok. Gibaligya niya ang iyang kaugalingong kalag, ug ang iyang dapit diha sa gingharian ni Cristo.

I Timoteo 6:10. Kay ang pagkamahigugmaon ug salapi mao ang gamot sa tanang pagkadautan.

Buhata Kini

3. Gipaabot ba ni Jesus nga Siya pagabudhian?
 - . . . a) Wala, kay wala Siya masayud mahitungod niini.
 - . . . b) Oo, apan wala Siya masayud si kinsa ang magabudhi Kaniya.
 - . . . c) Oo, nasayud Siya nga si Judas maoy magabudhi Kaniya.
4. Pag-ampo alang sa imong mga higala nga wala untay usa kanila nga magabaligya sa ilang mga kalag tungod sa paghigugma sa salapi.



ANG BAG-ONG SUGO (Basaha ang Juan 13:31-35)

Misulti pag-usab si Jesus sa Iyang mga tinun-an mahitungod sa Iyang kamatayon ug nga Siya moadto sa dapit diin ang mga tinun-an dili makaadto. Ang mga tinun-an kinahanglan nga magpabilin sa yuta ug magakinabuhi sa pagkaagi nga ang mga katawhan sa kalibutan masayud nga adunay butang nga nakalahi kanila. Kinahanglan silang magahigugmaay sa usag usa, ingon sa Iyang paghigugma kanila. Importante kini nga kasugoan nga kinahanglan natong pagatumanon adlaw-adlaw.

Buhata Kini

5. Unsa man ang bag-ong kasugoan nga gihatag ni Jesus ngadto sa Iyang mga tinun-an?
 - . . . a) Maghinugasay sila sa mga tiil sa usagusa adlaw-adlaw.
 - . . . b) Maghinigugmaay sila sa usag usa.
 - . . . c) Dili sila mangawat gikan sa tipiganan ug salapi.

GIPASIDAAN NI JESUS ANG PAGLIMOD NI PEDRO

(Basaha ang Juan 13:36-38)

Nakat-onan na nimo nga si Jesus mao ang Propeta nga gisaad sa Dios. Nagapakita ang Dios ngadto sa mga propeta sa mga butang nga mahitabo. Ug dayon ang mga propeta magatug-an sa maong hitabo sa dili pa mahitabo ang maong butang. Nabasa na nimo ang daghang panagna ni Jesus. Miingon Siya kinahanglang “igabayaw siya.” o ilansang. Ug nga si Judas magabudhi Kaniya ug si Pedro molimod nga wala siya makaila kang Jesus.

Nagtoo si Pedro nga siya malig-on pa kay sa ubang mga tinun-an. Apan nasayud si Jesus kon unsa kahuyang si Pedro ug nga naga-ampo si Jesus kaniya.

Buhata Kini

6. Gitag-an ni Jesus nga, si Pedro
 - . . . a) Mahimong pangulo sa simbahan
 - . . . b) Kanunayng magmatinud-anon Kaniya
 - . . . c) Magalimod Kaniya sa makatulo
7. Itandi ang imong mga tubag sa hustong mga tubag nga anaa sa katapusan niining leksyona.
8. Sulati ang imong rekord sa estudyante alang sa ika-13 nga leksyon.

Mga Tubag sa ika-13 nga Leksyon

Kon aduna kay 4 ka hustong mga tubag markahi ug labing maayo; kon 3 markahi ug maayo o kon 2, ra, kasarangan. Kon kubos sa 2 ang imong hustong tubag basaha kining leksyona.

1. a) Gikuha Niya ang dapit sa usa ka sulogoon ug gihugasan Niya ang tiil sa mga tinun-an.
3. c) Oo, nasayud si Jesus nga magluib si Judas Kaniya.
5. b) Kinahanglang Maghigugmaay sila sa usa ug usa.
6. c) Magalimod siya Kaniya sa makatulo.

Gidaghanon sa Hustong mga Tubag _____

Grado _____